

առ, որ ժողովին մասնակցում էին ներկայացուցիչներ Հայաստանի զանազան վայրերից: Այդ հանգամանքը պերճախօս ապացոյց է առ այն, որ Հայաստանի ազատութեան գաղափարը Զուլայեցու օրով այնքան ժողովրդականացած էր, որ կարողանում է իր շուրջը համարումբել զանազան գաւառների ներկայացուցիչներին: Թէեւ չմոռանանք իսկոյն աւելացնել, որ այդ ներկայացուցիչները — ամենայն հաւանականութեամբ — այսօրուան իմաստով ներկայացուցիչներ չէին, ընտրուած որոշ շրջանների կողմից եւ նրանց կարծիքների ու ցանկութիւնների թարգմանը. նրանք մասնակցում էին ժողովին անհատապէս. բայց որովհետեւ նրանցից իւրաքանչիւրը այս կամ այն շրջանի գլխաւորն էր, դրանով էլ նրանք ներկայացնում էին իրենց շրջանները:

1678 թ. ժողովը — ինչպէս տեսնում էք — նման մի խնդիր լուծելու համար, ինչպիսին է Հայաստանի ազատութեան խնդիրը, չափազանց սակաւամարդ էր, կազմուած պատահական ձեւով եւ միեւնոյն ժամանակ նաեւ շատ գաղտնի: Դրա պատճառը ոչ թէ այն էր, որ Հայաստանի ազատագրութեան գաղափարը ժողովրդականութիւն չունէր մեղանում — ինչպէս սխալմամբ այդ փաստից կարող են եզրակացնել շատերը — այլ վախն էր, վախը ե՛ւ տիրող պարսիկներից, ե՛ւ դաւաճան ու անպիտան հայերից:

Այդ վախը մենք տեսանք Միքայէլ Սեբաստացու օրով, որի պատճառով ամփոփուած էին նրանց ձեռքերը եւ պապանձուած՝ լեզուները: Տեսնում ենք եւ Զուլայեցու օրով, որի պատճառով աշխատանքները կատարում են ծայրայեղ զգուշաւորութեամբ: Կը տեսնենք նաեւ Իսրայէլ Օրիի օրով, որի պատճառով Օրիի եւ իր բոլոր գործակիցների գործունէութիւնը գաղտնիութեան քողով է ծածկուած:

Մի փոքրիկ կտոր Գանձասարի Եսայի կաթողիկոսի նամակից — գրուած 1721 թ. Մինաս վարդապետին — կարծում ենք բաւական է որոշ գաղափար տալու տիրող վախի մասին. «Յառաջմէ առ քեզ բերան առ բերան ասացեալ եմ եւ թղթով եւս ծանուցեալ եմ, իբր թէ մեք ի մէջ օձից բնակիմք, չեմք կարող զամենայն խորհուրդ եւ սրտի իղձ մեր կատարելապէս գրել ամենուրեք, զի քեզ յայտնի է հայոց ազգի

չարութիւն, որ մատնութենէ ի զատ բան չգիտեն. մտնաւանդ մեր թշնամիք եւ հակառակը անչափ կան եւ որպէս դու իսկ գրեալ ես՝ թէ ջուլայեցիք, թէ էջմիածնեցիք, թէ շամախեցիք: Աստուած մի արասցէ, որ այս թղթոց մէկն նոցա ձեռն անկանի. այլեւս հոգով մարմնով գերծանելու հնար չկայ»<sup>1</sup>):

Էջմիածնի ժողովը — ինչպէս վկայում են բոլոր փաստաթղթերը — համաձայնում է անգամ հայոց եկեղեցու անկախութիւնը զոհարել ժողովրդի ազատագրութեան գործին — եթէ դա պահանջուի իրենցից: Փրկութեան միայն մէկ ճանապարհ է տեսնում — Արեւմուտքի, գլխաւորապէս Պապի օգնութիւնը: Ուստի, ընտրուած է մի պատգամաւորութիւն կաթողիկոսի գլխաւորութեամբ, Յ հոգեւորական եւ Յ աշխարհական անդամներից բաղկացած, որը գաղտնի պիտի անցնէր Եւրոպա՝ Պապին, գերմանական կայսրին եւ ուստաց թաղաւորին դիմումներ անելու:

Մեզ թւում է, որ պատգամաւորութիւնը Պոլսում պիտի բաժանուէր երկու մասի, որոնցից հոգեւորական պատգամաւորները, կաթողիկոսի գլխաւորութեամբ, պիտի գնային Արեւմտեան Եւրոպա, իսկ աշխարհականները՝ Ռուսաստան:

Այս ենթադրութիւնը մենք անում ենք, հիմնուելով մէկ կողմից՝ այն խնդրագրի վրայ, որ Անգեղակոթի պատմական ժողովից յետոյ — Օրիի հրաւիրած — հայ մեկիքների կողմից ներկայացուցեց Պետրոս Մեծին (Եղեան, «Պետրոս Մեծի յարաբերութիւնները» փաստ., թիւ 6): Այնտեղ յիշատակուած է էջմիածնի ժողովը եւ պարզապէս ասուած. «Ընտրեցաք դ (Յ) իշխան, որ գան առ ձեր բարի թագաւորութիւնն եւ իմացնեն զմեր խորհուրդն»:

Այս վկայութիւնը մեր կարծիքով՝ պէտք է միանգամայն վստահելի համարել, որովհետեւ նախ՝ էջմիածնի ժողովականներից մէկը, Եավրի որդի Աղաջանը, լինելով նաեւ Զուլայեցու պատգամաւորութեան մէկ անդամը, ինքն էլ ստորագրել է Պետրոս Մեծին ներկայացուած վերոյիշեալ խնդրագրին եւ ուրեմն,

1) Աշ. Յովհաննիսեան, «Հայ-ուսու օրինատացիայի ծագման խնդիրը», էջմիածին, 1921, փաստ., թիւ 15: